



寄藥包

成過個人散赤兼躑个所在較偏僻，無大間病院好睺，若破病即真費氣。普通時若係落屎抑係寒著、發燒，屋下內底攏會囤一兜便藥。記得細漢个時，真久真久屋下即會有一個人揸一隻藥箱來到屋下，真好禮向阿媽講：伯嚮好，這回攞來換一兜藥。這時務阿媽即會枷吊在壁嶼面上的藥袋提落來。遐個人即會提一本簿子記，用幾多寒著个藥、胃散、外傷藥、止疾藥，猶有成過人講个美國仙丹這兜，算算愛幾多錢。這在遐個欠醫藥時代係真普遍个。

候孝賢導演打過一齣電影「戀戀風塵」內底即有這款个景象。細子人因為屋下散，普通時攏無麼个四秀好食，嘎去偷食胃散。得佢个阿媽發現了後，擎一支藤條討枷佢修理。這款个情景，得佢感受真深。想到做細子个時，嘛有共款个經驗，胃散食起來甘甘又鹹鹹，滋味毋會糗。

藥包內底个藥，有寫藥名以外，討得大部分毋識字个人睺，咳嗽即畫一隻蝦和一隻擎掃把个龜，號學老事个諧音。一個人攪食肚，一個人踞在屙屎，即知係落屎藥。一個人額頭吊一包水袋，即知係發燒个藥，牙疾即畫一個人用手掌嘴角，疾到面蚪蚪。這兜圖現時來睺感覺實在真心色。在遐個一切攏真無利便个時代，藥包係逐火灶定著有物件，現時5、60歲个人，對這定著毋會添放。這嘛係大家做細子共下个回想。隨著時代个演變，藥房愈開愈多間，密醫嘛消失去。今个人若破病，有真多診所，嘛有加真多大間病院好睺。得人感受著生活在今，實在係真幸福。

作者：李秉璋

☆詞彙學習☆

【散赤】san^ˆ cha^ˊ：貧窮。

【費氣】fui^ˆ ki^ˊ：麻煩。

【落屎】lau^ˆ shi^ˆ：拉肚子。

【便藥】pien rhio：成藥。

【美國仙丹】mi^ˆ gud^ˊ sien^ˇ dan^ˇ：類固醇。

【藤條】ten^ˋ teeu^ˋ：用藤做的棍子，用來趕牛用，也有用來當做處罰小孩的工具。

【學老事】hoo loo^ˆ su：閩南語。

【添放】teem^ˇ piong：忘記。

☆文法學習☆

【面蚪蚪】mien^ˆ kiu^ˋ kiu^ˋ：臉部因痛苦而糾結在一起。蚪蚪是形容詞，疊字修飾，有加強的意思。例：佢牙疾到堵毋會核，疾到面蚪蚪。（他牙疼到受不了，痛的整個臉都糾結在一起。）

【真無利便】zhin^ˇ mo^ˋ li pien：很不方便。「真」，程度副詞，相當於「很」。若要表示最高級的意思，用「頭」，如：頭佻意（最喜歡）。